

MALAYSIA
DEWAN NEGARA
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI ISNIN, 10 DISEMBER 2012, PUKUL 10.00 PAGI

Bil. 22

MENGANGKAT SUMPAH

PERTANYAAN-PERTANYAAN BAGI JAWAB LISAN

1. PN-1253-L15700
Datuk Haji Yunus bin Haji Kurus minta **PERDANA MENTERI** menyatakan bagaimana Kementerian melihat isu semangat kejiranan dan kaitannya dengan Gagasan 1Malaysia dalam usaha melahirkan masyarakat berbilang kaum yang dapat hidup dalam satu komuniti secara harmoni dan saling bantu-membantu.
2. PN-1253-L15561
Dato' Lim Nget Yoon minta **MENTERI PERUMAHAN DAN KERAJAAN TEMPATAN** menyatakan apakah tindakan yang diambil terhadap orang-orang yang tidak tinggal di rumah-rumah yang diperoleh melalui Projek Perumahan Rakyat (PPR) tetapi menyewakannya kepada orang lain.
3. PN-1253-L16066
Tuan Mohd. Khalid bin Ahmad minta **MENTERI SAINS, TEKNOLOGI DAN INOVASI** menyatakan:-
 - (a) apakah kedudukan digital Malaysia jika dibandingkan dengan negara-negara yang lain iaitu seperti yang telah dilaporkan oleh *Economist Intelligence Unit (EIU) Digital Economic Ranking*; dan
 - (b) apakah strategi-strategi yang akan diambil bagi Malaysia mencapai status ekonomi digital yang maju pada tahun 2020 dan apakah program-program atau projek-projek utama yang akan dilaksanakan.
4. PN-1253-L15387
Puan Hajah Rohani binti Abdullah minta **PERDANA MENTERI** menyatakan langkah-langkah Kerajaan khususnya Jabatan Kemajuan Islam Malaysia (JAKIM) bagi menangani isu lesbian, gay, biseksual dan transeksual (LGBT) di kalangan umat Islam di negara ini.

5. PN-1253-L15942

Dato' Dr. Firdaus bin Haji Abdullah minta **MENTERI BELIA DAN SUKAN** menyatakan:-

- (a) status penubuhan Parlimen Belia dan bentuk program yang dirancang dan apakah yang Kerajaan ingin capai dengan penubuhan Parlimen Belia ini; dan
- (b) bagaimanakah keanggotaan Parlimen Belia dipilih dan bagaimana jangka masa perkhidmatan setiap ahli yang dipilih/dilantik.

6. PN-1253-L15494

Dato' Nalla K. S. minta **MENTERI PERUSAHAAN PERLADANGAN DAN KOMODITI** menyatakan apakah langkah-langkah Kementerian dalam memastikan industri getah terus menjana pendapatan negara daripada segi penyelidikan dan pembangunan (R&D) yang baru bagi memastikan industri getah negara terus stabil di pasaran dunia.

7. PN-1253-L15918

Puan Hajah Dayang Madinah binti Tun Abang Haji Openg minta **MENTERI PELAJARAN** menyatakan para pelajar dan generasi muda hari ini perlu disuntik pengetahuan dan kesedaran mengenai betapa pentingnya pemuliharaan hutan dan alam semula jadi demi kehidupan manusia dan haiwan untuk jangka masa panjang. Apakah pendekatan pihak Kementerian dalam menitikberatkan pendidikan dalam hal tersebut.

8. PN-1253-L15398

To' Puan Hajah Zaitun binti Haji Mat Amin minta **MENTERI KESIHATAN** menyatakan langkah-langkah Kerajaan bagi mengatasi masalah kesesakan tempat letak kereta di hospital-hospital Kerajaan khususnya seperti Hospital Kuala Lumpur, Hospital Selayang, Hospital Serdang, Hospital Tengku Ampuan Rahimah, Klang dan Hospital Sungai Buluh dan Hospital Sultanah Nur Zahirah, Kuala Terengganu.

9. PN-1253-L15429

Dato' Dr. Johari bin Mat minta **MENTERI PENGAJIAN TINGGI** menyatakan:-

- (a) statistik kolej swasta (IPTS) yang ditutup sejak 3 tahun lalu; dan
- (b) usaha-usaha pemantauan terhadap Program Jarak Jauh (PJJ) yang ditawarkan di IPTA dan IPTS.

10. PN-1253-L16109

Dato' Syed Ibrahim bin Kader minta **PERDANA MENTERI** menyatakan terdapat ramai mualaf yang tidak menukar kad pengenalan (selepas memeluk Islam) kepada kad pengenalan menggunakan nama Islam. Keadaan ini menimbulkan pelbagai masalah dalam pelbagai urusan. Apakah tindakan Kementerian bagi mengatasi masalah ini.

11. PN-1253-L15792
Puan Chew Lee Giok minta **MENTERI PENERANGAN, KOMUNIKASI DAN KEBUDAYAAN** menyatakan jumlah dana yang dikutip setiap tahun di bawah rancangan perkhidmatan penyediaan sejagat *Universal Services Provision* (USP). Sejauh mana kejayaan rancangan ini sejak diperlaksanakan lebih 10 tahun yang lalu.
12. PN-1253-L15624
Tuan Syed Shahir bin Syed Mohamud minta **MENTERI PERTANIAN DAN INDUSTRI ASAS TANI** menyatakan sejauh mana jumlah petani dan pekebun kecil yang dibelenggu oleh hutang dan apakah langkah yang diambil bagi mengatasi masalah hutang tersebut termasuk menyediakan kemudahan-kemudahan kredit sesuai dengan kemampuan mereka.
13. PN-1253-L16143
Tuan Baharudin bin Abu Bakar minta **PERDANA MENTERI** menyatakan apakah langkah-langkah Kerajaan untuk menangguhkan hukuman mati kepada pesalah membabitkan pengedaran dadah dan kaitannya dengan usaha Kerajaan untuk menyelamatkan ramai rakyat Malaysia yang berdepan dengan hukuman mati di luar negara.
14. PN-1253-L15470
Tuan Haji Muhamad Yusof bin Husin minta **MENTERI KESIHATAN** menyatakan sehingga kini berapa ramai rakyat Malaysia yang menghadapi masalah dan sakit mental mengikut status mereka dan apakah langkah-langkah yang diambil oleh Kementerian untuk mengatasi masalah ini.
15. PN-1253-L15621
Puan Hajah Khairiah binti Mohamed minta **MENTERI KERJA RAYA** menyatakan purata masa yang diambil oleh pemandu kenderaan daripada Kuala Lumpur ke Kota Bharu melalui Jalan Bentong-Gua Musang pada waktu biasa dan pada musim perayaan.
16. PN-1253-L15886
Datuk Chiw Tiang Chai minta **MENTERI PENGANGKUTAN** menyatakan adakah Kementerian berpandangan cadangan mewujudkan institusi atau akademi lokomotif mampu melahirkan tenaga kerja mahir selaras dengan industri pengangkutan di negara ini.
17. PN-1253-L15541
Dato' Lim Nget Yoon minta **MENTERI PEMBANGUNAN WANITA, KELUARGA DAN MASYARAKAT** menyatakan langkah-langkah diambil oleh pihak Kementerian untuk memastikan tidak ada lagi pengemis-pengemis asing ataupun pengemis-pengemis tempatan di Bandaraya Kuala Lumpur.
18. PN-1253-L15717
Tuan Chiew Lian Keng minta **MENTERI PENGAJIAN TINGGI** menyatakan kriteria yang perlu dipenuhi oleh institut pengajian tinggi supaya layak menerima pelajar asing.

19. PN-1253-L15874

Dato' Boon Som a/l Inong minta **MENTERI PELAJARAN** menyatakan adakah Kementerian bercadang untuk menambah jumlah kakitangan sokongan di sekolah-sekolah bagi tujuan membantu guru-guru yang bertanggungjawab mengumpul dan menginput data, termasuk maklumat latar belakang serta keputusan ujian dan peperiksaan murid, dalam usaha mengurangkan beban tugas yang ditanggung oleh guru di sekolah.

20. PN-1253-L15643

Datuk Pau Chiong Ung minta **MENTERI SUMBER MANUSIA** menyatakan:-

(a) adakah pihak Kementerian menerusi Jabatan Tenaga Kerja berhasrat untuk mengkaji semula pengambilan tenaga kerja asing bagi sektor perladangan yang mana kelulusan diberikan terlalu sedikit dan ini menyebabkan majikan mengambil tenaga asing tanpa izin; dan

(b) apakah pihak Kementerian turut bekerjasama dengan pihak Jabatan Imigresen dalam pengambilan tenaga kerja asing bagi sektor perladangan dan berapa peratuskah peningkatan pengambilan tenaga kerja warga asing yang telah diluluskan oleh pihak Kementerian bagi tahun 2011.

21. PN-1253-L15770

Puan Hajah Mariany binti Mohammad Yit minta **PERDANA MENTERI** menyatakan penjelasan mengenai jumlah kes-kes MAL Syariah di seluruh negara, dan adakah Kerajaan bercadang untuk menubuhkan satu bentuk Tabung Bantuan Guaman bagi orang perseorangan yang menghadapi kesulitan dalam membiayai urusan dan bayaran perkhidmatan guaman syariah agar perjalanan kes-kes MAL ini lebih cekap dan mengurangkan berlakunya tunggakan kes-kes MAL di Malaysia.

22. PN-1253-L15975

Puan Hajah Noriah binti Mahat minta **MENTERI PERDAGANGAN ANTARABANGSA DAN INDUSTRI** menyatakan sejauh manakah pasaran kereta buatan nasional di luar negara sejak 5 tahun lalu dan apakah langkah-langkah yang diambil bagi meningkatkan lagi pasarannya di luar negara.

23. PN-1253-L16029

Puan Roslin binti Haji Abdul Rahman minta **MENTERI PENGAJIAN TINGGI** menyatakan jumlah peminjam Perbadanan Tabung Pendidikan Tinggi Nasional (PTPTN) dan jumlah pinjaman yang telah dikeluarkan setakat ini serta nyatakan jumlah tunggakan pinjaman.

24. PN-1253-L15934

Dato' Dr. Firdaus bin Haji Abdullah minta **PERDANA MENTERI** menyatakan perkembangan terkini dan masalah-masalah yang dihadapi dalam usaha pembinaan masjid di Brickfields, Kuala Lumpur.

25. PN-1253-L15978
Dr. Syed Husin Ali minta **MENTERI KERJA RAYA** menyatakan berapakah jumlah lebuh raya yang akan dibina sekitar Lembah Klang dalam tempoh 10 tahun yang akan datang dan adakah Kementerian merancang untuk membina lebuh raya selagi terdapat pertambahan kenderaan awam.
26. PN-1253-L15509
Dato' Haji Abdul Rahman bin Bakar minta **PERDANA MENTERI** menyatakan apakah langkah-langkah yang diambil ke atas cadangan dalam Laporan Jawatankuasa Pilihan Khas Berhubung Penambahbaikan Proses Pilihan Raya. Apakah ia akan meletakkan Suruhanjaya Pilihan Raya (SPR) di bawah pentadbiran Parlimen, bukannya Jabatan Perdana Menteri.
27. PN-1253-L15458
Tuan Haji Ahamat @ Ahamad bin Yusop minta **MENTERI PELAJARAN** menyatakan langkah-langkah Kementerian menaik-taraf fungsi dan perkhidmatan Pejabat Pendidikan Daerah (PPD) bagi memperkasakan sekolah-sekolah dan meningkatkan kualiti pendidikan setiap daerah di bawah kawal-selianya.
28. PN-1253-L16045
Datuk Raja Ropiaah binti Raja Abdullah minta **MENTERI TENAGA, TEKNOLOGI HIJAU DAN AIR** menyatakan sejauh manakah keberkesanan Skim Dana Skim Pembentangan Teknologi Hijau yang dibentangkan di dalam Bajet 2013 sehingga ke hari ini khususnya dari aspek pendidikan, pemuliharaan alam sekitar dan perniagaan.
29. PN-1253-L15558
Puan Norliza binti Abdul Rahim minta **MENTERI KESIHATAN** menyatakan apakah langkah-langkah Kementerian dalam memberi pendedahan dan kesedaran kepada rakyat mengenai kepentingan memiliki insurans perubatan.
30. PN-1253-L15906
Datuk Chin Su Phin minta **MENTERI KEWANGAN** menyatakan berapakah jumlah rampasan penyeludupan yang telah berjaya dikutip oleh Kastam DiRaja Malaysia dari tahun 2007 hingga sekarang dan adakah ia dilihat berjaya.
31. PN-1253-L15388
Puan Hajah Rohani binti Abdullah minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan langkah-langkah Kementerian untuk memaju dan membangunkan koperasi bagi mencapai sasaran Keluaran Dalam Negara Kasar (KDNK) sebanyak 10 peratus menjelang 2020.
32. PN-1253-L15400
To' Puan Hajah Zaitun binti Haji Mat Amin minta **MENTERI PENERANGAN, KOMUNIKASI DAN KEBUDAYAAN** menyatakan langkah-langkah Kementerian bagi meningkatkan aktiviti perpustakaan dan penambahbaikan kira-kira 1,700 perpustakaan seluruh negara serta nyatakan langkah-langkah bagi memupuk budaya membaca.

33. PN-1253-L15607
Tuan Syed Shahir bin Syed Mohamud minta **MENTERI KESIHATAN** menyatakan berapakah peruntukan belanjawan (*budget allocation*) untuk rakyat yang menghidap penyakit buah pinggang kronik dan berapakah jumlah pesakit buah pinggang kronik tersebut menurut pecahan kumpulan etnik.
34. PN-1253-L15733
Tuan Mohamad Ezam bin Mohd Nor minta **MENTERI KERJA RAYA** menyatakan jumlah kontraktor kelas A dan kelas B yang terdaftar dengan Jabatan Kerja Raya (JKR) dan jumlah kontraktor kelas B dan ke bawah yang dimiliki oleh kontraktor kelas A yang sama serta sejauh mana JKR membendung kes monopoli kontrak oleh gergasi-gergasi kontraktor.
35. PN-1253-L15602
Puan Hajah Khairiah binti Mohamed minta **MENTERI KEWANGAN** menyatakan bilangan pusat pajak gadai Islam yang beroperasi dan bilangan pelanggan di seluruh Malaysia. Nyatakan mekanisme yang diguna pakai bagi memastikan produk pajak gadai Islam yang ditawarkan adalah menepati kehendak syariah.
36. PN-1253-L15866
Dato' Boon Som a/l Inong minta **MENTERI KESIHATAN** menyatakan bilangan pesakit yang dikesan menghidap strok, punca-punca penyakit itu serta langkah-langkah yang telah diambil untuk membantu pesakit serta meningkatkan kesedaran orang ramai mengenai penyakit berkenaan.
37. PN-1253-L16097
Dato' Syed Ibrahim bin Kader minta **MENTERI SUMBER MANUSIA** menyatakan masalah yang dihadapi oleh pemandu-pemandu lori yang mempunyai gaji pokok yang sangat rendah walaupun pendapatan sebenar mereka mencecah RM2,000 hingga RM3,000 sebulan menyukarkan mereka membuat pinjaman perumahan atau kereta dari bank sekaligus menyebabkan mereka tidak mendapat kehidupan yang berkualiti. Mohon Kementerian melihat kepada permasalahan ini.
38. PN-1253-L15898
Datuk Chin Su Phin minta **MENTERI BELIA DAN SUKAN** menyatakan apakah Kementerian merasakan perlunya ada rombakan besar-besaran dalam Persatuan Badminton Malaysia (BAM) dan Persatuan Bola Sepak Malaysia (FAM) dalam memastikan sukan badminton dan bola sepak negara akan dapat terus bersaing di peringkat antarabangsa.
39. PN-1253-L15965
Dr. Syed Husin Ali minta **MENTERI LUAR NEGERI** menyatakan adakah Kerajaan akan berusaha untuk mencari jalan perdamaian di Selatan Thai dan cuba memberi bantuan kemanusiaan kepada mangsa dan/atau keluarga mangsa (orang awam) akibat persengketaan di sana.

40. PN-1253-L16048

Tuan Mohd. Khalid bin Ahmad minta **MENTERI KEWANGAN** menyatakan:-

- (a) sejauh manakah Badan-Badan Berkanun dan Syarikat-Syarikat Berkaitan Kerajaan Persekutuan dan Negeri mematuhi Amalan Terbaik Tadbir Urus Korporat, Kod Tadbir Urus Korporat Malaysia dan Pekeliling Perbendaharaan Bil.12 Tahun 1993 daripada segi komposisi dan keseimbangan Lembaga Pengarah dengan melantik Pengarah Bukan Eksekutif Bebas (*Independent Non-Executive Director*); dan
- (b) sejauh manakah Surat Pekeliling Am Bil. 3 Tahun 1998 dan Pekeliling Perkhidmatan Bil. 3 Tahun 1985 yang telah menetapkan Lembaga Pengarah Syarikat Berkaitan Kerajaan (GLC) bermesyuarat sekurang-kurangnya 3 bulan sekali dan menyediakan laporan prestasi kewangan kepada Badan Berkanun atau Kerajaan dan juga Pekeliling Perbendaharaan Bil.9 Tahun 1993 yang menghendaki GLC menubuhkan Jawatankuasa Audit dan Pemeriksaan telah dipatuhi.

41. PN-1253-L15726

Tuan Chiew Lian Keng minta **MENTERI PENERANGAN, KOMUNIKASI DAN KEBUDAYAAN** menyatakan mengapa penganugerahan spektrum 2.6 GHZ kepada Syarikat Telco tidak melalui proses pembidaan terbuka seperti negara-negara lain dan apakah rasionalnya.

42. PN-1253-L15678

Puan S. Bagiam a/p Ayem Perumal minta **MENTERI PEMBANGUNAN WANITA, KELUARGA DAN MASYARAKAT** menyatakan apakah sistem yang diwujudkan untuk mengambil dan melatih kaum wanita untuk menjadi ahli dalam pengurusan tertinggi dalam sesuatu syarikat atau agensi Kerajaan agar mereka ini tidak tertinggal dalam arus pembangunan global dan apakah Kementerian menetapkan sistem kuota untuk mengambil dan melatih dalam program sedemikian.

43. PN-1253-L16030

Datuk Raja Ropiaah binti Raja Abdullah minta **MENTERI SUMBER MANUSIA** menyatakan kadar gaji di Malaysia adalah masih antara yang terendah di rantau ini berbanding dengan kadar gaji di Singapura/Hong Kong/Jepun umpamanya. Ini mewujudkan perspektif yang malap kepada graduan universiti yang sebaik memulakan kerjaya akan terus masuk ke dalam kelas golongan miskin bandar berdasarkan pendapatan yang kurang dari RM3,000 sebulan. Dalam situasi sebegini bolehkah Kerajaan memikirkan bagi melaksanakan reformasi gaji sektor awam dan swasta untuk menangani isu ini di samping untuk meningkatkan produktiviti di setiap peringkat jawatan di sektor awam dan swasta.

44. PN-1253-L15652

Tuan Khoo Soo Seang minta **MENTERI PERDAGANGAN ANTARABANGSA DAN INDUSTRI** menyatakan faktor-faktor yang menarik pelabur asing ke Malaysia sehingga menjadi yang kelima paling popular di kalangan pelabur asing, serta langkah-langkah yang telah dan akan diambil demi memperkuuhkan lagi daya saing negara di arena dunia.

45. PN-1253-L15459
Tuan Haji Muhamad Yusof bin Husin minta **MENTERI KERJA RAYA** menyatakan apakah langkah-langkah yang diambil oleh Kementerian untuk mengatasi masalah kesesakan jalan raya di pusat-pusat bandar yang semakin meningkat terutamanya pada musim perayaan.
46. PN-1253-L15532
Datuk Kadzim M. Yahya minta **MENTERI KEWANGAN** menyatakan apakah Kerajaan Persekutuan bersedia menimbang bagi menurunkan kuasa kepada Kerajaan Negeri Sabah untuk merancang, mengurus, melaksana dan mengawasi projek-projek biayaan Kerajaan Pusat. Desentralisasi kuasa sebegini akan memastikan projek-projek dilaksanakan dalam tempoh yang wajar dan menepati sasaran di samping akan mengurangkan ketirisan dan mampu menemui penyelesaian segera jika bermasalah.
47. PN-1253-L15954
Puan Hajah Noriah binti Mahat minta **MENTERI KEMAJUAN LUAR BANDAR DAN WILAYAH** menyatakan apakah langkah-langkah yang akan diambil bagi memaksimumkan penggunaan yang disediakan di mini *Rural Transformation Centre* (RTC) di seluruh negara.
48. PN-1253-L15999
Tuan Subramiam a/l Veruthasalam minta **MENTERI PERDAGANGAN ANTARABANGSA DAN INDUSTRI** menyatakan usaha-usaha yang telah diambil oleh Kerajaan Persekutuan untuk meningkatkan pelaburan asing di Malaysia secara am, dan di negeri-negeri Penang, Selangor, Kedah dan Kelantan secara khusus, kerana ada pihak yang mengatakan kononnya jumlah pelaburan asing di negeri tersebut adalah semata-mata kerana usaha kerajaan negeri masing-masing.
49. PN-1253-L15813
Dato' Mohammed Najeeb bin Abdullah minta **MENTERI BELIA DAN SUKAN** menyatakan peranan yang dimainkan oleh Institut Sukan Negara untuk mengurangkan isu pengambilan dadah oleh atlet-atlet negara. Insiden atlet negara yang dikesan menggunakan dadah di peringkat antarabangsa amat mendukacitakan.
50. PN-1253-L16131
Dr. S. Ramakrishnan minta **PERDANA MENTERI** menyatakan mengapa laporan kewangan Petronas tidak dibentang di Parlimen memandangkan ini adalah harta negara dan rakyat perlu diberitahu.
51. PN-1253-L16013
Tuan Subramiam a/l Veruthasalam minta **PERDANA MENTERI** menyatakan bilangan dan peratus pegawai kanan (JUSA) di kalangan Pegawai Tadbir & Diplomat berketurunan India.
52. PN-1253-L15814
Dato' Mohammed Najeeb bin Abdullah minta **MENTERI KEWANGAN** menyatakan jumlah kerugian yang dialami oleh Malaysia kerana aktiviti penyeludupan rokok sejak 2007 sehingga 2011. Mengapa aktiviti ini masih berleluasa dan strategi baru Kerajaan bagi membendung kegiatan haram ini.

ATURAN URUSAN MESYUARAT DAN USUL-USUL

- | | | | |
|----|----------------|---|-------------------------------|
| 1. | (D.R. 31/2012) | Rang Undang-undang Perbekalan 2013 - Menyambung semula Perbahasan atas masalah, "Bahawa Rang Undang-undang ini dibacakan kali yang kedua sekarang."
(6 Disember, 2012) | |
| | | [Menteri Kewangan] | |
| 2. | (D.R. 35/2012) | Rang Undang-undang Kewangan (No. 2) 2012 | Bacaan Kali Yang Kedua |
| | | [Menteri Kewangan] | |
| 3. | (D.R. 40/2012) | Rang Undang-undang Perkhidmatan Kewangan 2012 | " |
| | | [Menteri Kewangan] | |
| 4. | (D.R. 41/2012) | Rang Undang-undang Perkhidmatan Kewangan Islam 2012 | " |
| | | [Menteri Kewangan] | |
| 5. | (D.R. 39/2012) | Rang Undang-undang Bank Negara Malaysia (Pindaan) 2012 | " |
| | | [Menteri Kewangan] | |
| 6. | (D.R. 37/2012) | Rang Undang-undang Penyelarasian Pencen (Pindaan) 2012 - Menyambung semula Perbahasan atas masalah, "Bahawa Rang Undang-undang ini dibacakan kali yang kedua sekarang."
(4 Disember, 2012) | |
| | | [Menteri Di Jabatan Perdana Menteri] | |
| 7. | (D.R. 32/2012) | Rang Undang-undang Pengurusan Strata 2012 | " |
| | | [Menteri Perumahan dan Kerajaan Tempatan] | |
| 8. | (D.R. 38/2012) | Rang Undang-undang Reka Bentuk Perindustrian (Pindaan) 2012 | " |
| | | [Menteri Perdagangan Dalam Negeri, Koperasi dan Kepenggunaan] | |

9. (D.R. 43/2012) Rang Undang-undang Perbadanan "Kemajuan Filem Nasional Malaysia (Pindaan) 2012

[Menteri Penerangan, Komunikasi Dan Kebudayaan]

10. (D.R. 42/2012) Rang Undang-undang Binatang (Pindaan) 2012 "

[Menteri Pertanian dan Industri Asas Tani]

11. PN-1253-U15525

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan supaya disegerakan proses memansuhkan hukuman mati mandatori berdasarkan kepada maklumat berikut:- Menteri di Jabatan Perdana Menteri, Datuk Seri Mohamed Nazri Abdul Aziz berkata, beliau akan mengadakan perjumpaan dengan Perdana Menteri, Datuk Seri Najib Tun Razak dalam masa terdekat bagi membincangkan mengenai satu inisiatif akan dilakukan bagi mewujudkan moratorium (penangguhan) terhadap hukuman mati terhadap mereka yang didapati bersalah memiliki dadah. Mohamed Nazri menegaskan yang Kerajaan sedang menimbang cadangan menangguhkan pelaksanaan hukuman mati terhadap pesalah dadah di negara ini sementara menunggu hasil kajian semula yang dijalankan Pejabat Peguam Negara. Katanya hukuman ganti kes pemilikan dadah sedang dikaji Pejabat Peguam Negara. Sementara, Mohamed Nazri akan berbincang dengan Perdana Menteri supaya kes pemilikan dadah, mereka yang dijatuhi hukuman (mati), akan diminta moratorium, jangan digantung sebab Kerajaan kita sedang meneliti hukuman sedia ada. Mohamed Nazri juga berkata, permohonan moratorium itu wajar memandangkan sebahagian daripada 900 orang yang sedang menunggu hukuman mati ketika ini adalah pesalah dadah. Perlu disebut, kajian ini dilakukan bertujuan menyelamatkan nyawa rakyat Malaysia di luar negara seperti China, Columbia, Peru dan Venezuela yang berdepan hukuman mati akibat menjadi keldai dadah. Antara hukuman terbaik bagi menggantikan hukuman mati mandatori bagi pesalah dadah, Mohamed Nazri berkata, hukuman penjara 30 atau 35 tahun boleh dikenakan kerana kesalahan itu tidak lagi dianggap serius seperti jenayah pembunuhan. Jika hukuman mati mandatori bagi kesalahan dadah dimansuhkan, hakim akan menggunakan budi bicara dalam menentukan hukuman bagi pesalah dadah. Justeru, berdasarkan kepada senario berkaitan, saya mencadangkan agar Kerajaan mempercepatkan proses berkenaan. Jika perlu, satu jawatankuasa khas di peringkat Parlimen wajar diadakan. Ini penting demi untuk keharmonian dan kemakmuran sejagat dan kebajikan kepada keluarga para pesalah."

[Menteri di Jabatan Perdana Menteri]

12. PN-1253-U15526

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan dan mengesa agar kebebasan media berlaku secara sistematik, berhemah dan berintegriti. Tanggapan kebebasan media bagi pemimpin politik berdasarkan kebebasan untuk media yang hanya menyebelahi mereka dan yang seiring dengan mereka sahaja. Politik dan media sememangnya saling memerlukan. Orang politik memerlukan media untuk mempromosi diri dan wawasan mereka dan media pula memerlukan ahli politik sebagai bahan penulisan mereka. Lazimnya hubungan antara ahli politik dan media bagaimanapun tidak selalu kekal harmoni sepanjang masa. Lazimnya ahli politik akan menyanjung media apabila cerita-cerita positif tentang mereka dilaporkan. Namun begitu, apabila berita yang dilaporkan itu tidak positif, media akan dipersalahkan kononnya untuk menjatuhkan reputasi ahli politik terlibat. Kini telah menjadi satu trend apabila media dijadikan "punching bag" oleh ahli politik untuk menafikan berita yang tidak memihak kepada mereka. Ironinya, pihak yang menjadikan media sasaran saman yang rata-rata angkanya mencecah jutaan ringgit dan pihak sama juga yang melaung-laungkan tentang kebebasan bersuara dan menuntut kebebasan media di negara ini. Keadaan berkenaan bukan melibatkan ahli politik sahaja tetapi meliputi sebuah masyarakat dalam konteks kebebasan media. Dan pengamal media yang berintegriti tidak takut untuk mempersempahkan berita berdasarkan fakta. Berani kerana benar. Mereka tidak takut dikritik mahupun menerima kutukan oleh pelbagai pihak. Justeru, bagi menentukan kebebasan media berlaku secara sistematik, berhemah dan berintegriti, apakah pihak Kementerian sedang merangka atau menggubal ke arah mana media negara ini sedang berada. Apakah kerajaan sedar bahawa satu majlis media kebangsaan perlu diwujudkan dan pertubuhan rasmi ini akan menjadi pemantau bagi kedua-dua pihak iaitu pengamal media dan masyarakat. "

[Menteri Penerangan, Komunikasi dan Kebudayaan]

13. PN-1253-U15527

Dato' Haji Abdul Rahman bin Bakar akan mencadangkan:-

"Bahawa Dewan ini mencadangkan agar institusi kewangan mempertimbangkan untuk mempermudahkan pemberian pinjaman kepada pencipta produk inovasi termasuk membabitkan teknologi hijau dalam usaha melahirkan lebih ramai lagi generasi pencipta. Menteri Sains, Teknologi dan Inovasi, Datuk Seri Dr. Maximus Johnity Ongkili menegaskan bahawa sehingga kini banyak syarikat yang mahu membuat pinjaman untuk menjayakan penciptaan sesuatu produk, namun tidak dapat berbuat demikian ekoran syarat ketat institusi kewangan. Justeru, kerana mereka tidak mempunyai rujukan kejayaan lampau ciptaan berkenaan dan menganggap ia sukar dipasarkan. Untuk tujuan itu, pihak kementerian wajar membentuk satu jawatankuasa khas dengan Kementerian Tenaga, Teknologi Hijau dan Air serta Kementerian Kewangan untuk menyelaras kaedah bagi membantu pencipta terbabit. Kita juga berharap agar peserta atau pemohon dibantu dengan segera, sekali gus dapat menyelesaikan masalah pertimbangan insitusi kewangan yang memproses permohonan itu mengikut prinsip perbankan biasa. Saya juga mencadangkan agar insitusi kewangan mempertimbangkan untuk memberi nilai kepada hak intelek sesuatu produk inovasi yang dibentangkan pencipta bagi proses permohonan pinjaman.

Jika ini dapat dilakukan, sudah pasti akan membantu dan menggalakkan para pencipta untuk menghasilkan produk yang bukan sahaja dapat memanfaatkan kepada masyarakat, bahkan dikomersialkan bagi menjana pendapatan yang tinggi."

[Menteri Sains, Teknologi dan Inovasi]

14. PN-1253-U15528

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan agar penglibatan sektor swasta juga diambil kira dalam memantapkan Pelan Pembangunan Pendidikan (PPP) yang dilancarkan oleh Perdana Menteri baru-baru ini yang menekankan kepada konsep ilmu yang mampu dimanfaatkan oleh generasi yang akan datang iaitu selari dengan tuntutan semasa dunia/global. Pelan berkenaan cukup rapi dan kemas di dalam mencipta hala tuju negara ke arah negara maju pada tahun 2020. Pelan yang mantap berkenaan semestinya memerlukan pemahaman dan pelaksanaan yang strategik di kalangan warga pendidik, ibu bapa dan para pelajar. Pelan yang mempunyai tiga gelombang iaitu pada 2013-2015; 2015-2020 dan 2020-2025 itu telah mengambil kira pelbagai harapan, rintangan, cabaran, situasi dunia dan perkembangan kemahiran di kalangan masyarakat. Contohnya, apakah vokasional dan kemahiran (hand-on) telah dihidupkan dan diperkemaskan yang wajar diperkembangkan kepada para pelajar di peringkat sekolah menengah lagi. Ianya sebagai usaha untuk mengimbangi di antara ilmu bersifat akademik dan bersifat kemahiran. Kedua-duanya sudah pasti akan menjadikan negara kita lebih maju di dalam aspek pelajaran dan pembelajaran. Menyedari hakikat berkenaan, saya merasakan pelan berkenaan akan lebih mantap sekiranya peranan sektor swasta diambil kira. Pihak swasta akan menjadi pemangkin kepada konsep pembelajaran sepanjang hayat. Semua firma dan kilang-kilang bertaraf antarabangsa perlu melaksanakan CSR mereka dan memberi ruang/ peruntukan kewangan kepada para pelajar yang ingin melanjutkan pelajaran ke peringkat yang lebih tinggi. Konsep ini telah dilaksanakan dengan jayanya di Australia dan Jerman. Sementara, para pelajar lepasan institusi kemahiran perlu difikirkan tentang ganjaran kepada mereka melebihi daripada yang berasaskan akademik semata-semata. Di masa sama, universiti awam/swasta hendaklah diperbanyakkan di negara ini sehingga peringkat PhD. Lebih penting supaya hasrat pelan ini menjadi kenyataan selari dengan Model Baru Ekonomi (MBE) ke arah menjadikan Malaysia sebuah negara maju berpendapatan tinggi."

[Menteri Pelajaran]

15. PN-1253-U15529

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan dan mencadangkan agar projek Perumahan Rakyat PR1MA di perbanyakkan lagi dan proses permohonannya dipermudahkan memandangkan rumah atau perlindungan merupakan salah satu keperluan manusia di dunia ini. Rumah juga merupakan suatu jaminan keselamatan dan kesihatan kepada penduduk dunia. Akibat kekurangan rumah atau tempat tinggal yang tidak terurus atau tidak menepati piawaian atau tidak lengkap atau tidak sesuai didiami, sudah tentu akan mewujudkan penyakit masyarakat yang lain termasuk penyalahgunaan najis dadah, kecurian, rogol, rompak, samun dan lain-lain.

Atas sifat dan kesedaran akan kepentingan rumah kepada penduduk negara ini, pelbagai program telah dilaksanakan antaranya rumah mesra rakyat, rumah PPRT, rumah mampu milik dan rumah kos rendah/sederhana yang telah mendapat sambutan hangat di kalangan rakyat. Namun, melihat kepada penduduk negara kita yang berkembang pada kadar 3.5% setahun, saya rasa pertambahan berkenaan terus meningkat kepada keperluan rumah untuk berlindung. Justeru, pengekalan dan pelaksanaan rumah PRIMA adalah antara yang terbaik terutamanya di kalangan penduduk bandar. Bagaimanapun bilangan rumah berkenaan masih kecil dan perlu diperbanyakkan lagi. Saya suka mencadangkan agar pihak Kementerian Perumahan dan Kerajaan Tempatan (KPKT) terus memberi ruang kepada GLC atau anak syarikat Kerajaan negeri untuk membina rumah PRIMA di samping SPNB dan UDA. Sementara, KPKT juga diminta mempermudahkan proses permohonan secara online dan memberikan jawapan segera terhadap permohonan berkenaan. Ini penting sebagai slogan "Rumahku Syurgaku" yang memberi kesan psikologi kepada pemohon (rakyat) kerana dirasakan mereka dihargai. Kalau sesuai, rumah kedua/ketiga juga boleh ditimbangkan kepada pemohon sekiranya berlaku lambakan kepada rumah-rumah PRIMA."

[Menteri di Jabatan Perdana Menteri]

**RISALAT-RISALAT YANG DIBAWA KE DALAM MESYUARAT
(DEWAN NEGARA)**

<u>TAHUN 2012</u>	<u>RISALAT/DOKUMEN</u>	<u>TARIKH DIBENTANGKAN</u>
ST.66	Laporan Tahunan dan Penyata Kewangan Agensi Kelayakan Malaysia (MQA) Bagi Tahun 2011	10 Disember 2012
ST.90	Laporan Tahunan dan Penyata Kewangan Lembaga Pembangunan Industri Pembinaan Malaysia (CIDB) Bagi Tahun 2011	10 Disember 2012
ST.93	Laporan Tahunan dan Penyata Kewangan Suruhanjaya Koperasi Malaysia (SKM) Bagi Tahun 2011	10 Disember 2012
ST.100	Laporan Tahunan dan Penyata Kewangan Lembaga Pembangunan dan Penyelidikan Perhutanan Malaysia (LPPPM) Bagi Tahun 2011	10 Disember 2012
ST.105	Laporan Tahunan dan Penyata Kewangan Lembaga Pelabuhan Kuantan Bagi Tahun 2011	10 Disember 2012
ST.106	Laporan Tahunan dan Penyata Kewangan Lembaga Pelabuhan Kemaman Bagi Tahun 2011	10 Disember 2012
ST.110	Laporan Tahunan dan Penyata Kewangan Majlis Amanah Rakyat (MARA) Bagi Tahun 2011	10 Disember 2012
ST.114	Laporan Tahunan dan Penyata Kewangan Lembaga Kemajuan Terengganu Tengah (KETENGAH) Bagi Tahun 2011	10 Disember 2012
ST.118	Laporan Tahunan dan Penyata Kewangan Kumpulan Wang Amanah Negara (KWAN) Bagi Tahun 2011	10 Disember 2012

<u>TAHUN 2012</u>	<u>RISALAT/DOKUMEN</u>	<u>TARIKH DIBENTANGKAN</u>
ST.123	Laporan Tahunan dan Penyata Kewangan Institut Penyelidikan dan Kemajuan Pertanian Malaysia (MARDI) Bagi Tahun 2011	10 Disember 2012
ST.135	Laporan Tahunan dan Penyata Kewangan Pertubuhan Berita Nasional Malaysia (BERNAMA) Bagi Tahun 2011	10 Disember 2012
ST.137	Laporan Tahunan dan Penyata Kewangan Perbadanan Kemajuan Filem Nasional Malaysia Bagi Tahun 2011	10 Disember 2012
ST.147	Laporan Tahunan dan Penyata Kewangan Perbadanan Putrajaya Bagi Tahun 2011.	10 Disember 2012
ST.151	Laporan Tahunan dan Penyata Kewangan Universiti Malaysia Perlis (UniMAP) Bagi Tahun 2011.	10 Disember 2012
ST.155	Laporan Tahunan dan Penyata Kewangan Universiti Malaysia Sabah (UMS) Bagi Tahun 2011	10 Disember 2012
ST.157	Laporan Tahunan dan Penyata Kewangan Universiti Teknologi MARA (UiTM) Bagi Tahun 2011.	10 Disember 2012
CMD.45	Laporan Tahunan Suruhanjaya Perkhidmatan Pelajaran Malaysia (SPP) Bagi Tahun 2011	10 Disember 2012